

Sing vooraf staande: Skrifberyming 20-2:6 (50:6)

- 6 Bewaar die Kerk wat nou nog stry, / en wil haar onder kruis verbly;
vertrous die neergeboë hart, / genees die krankes in hul smart.

Ons hulp is in die Naam van die Here wat die hemel en die aarde geskape het.

Geliefdes, genade en vrede vir u van God ons Vader en die Here Jesus Christus deur die kragtige werking van God die Heilige Gees.

Amen.

Lofpsalm 147:2 (p. 704)

- 2 Hy heel gebrokenes van hart, / en Hy verbind hul in hul smart.
Sy oë speur oneindig ver; / Hy tel en roep die laaste ster;
sy krag en kennis, ongemeet, / oorwelf al wat ons ken en weet.
Sagmoediges verhef Hy weer, / maar goddeloses werp Hy neer.

Geloofsbelydenis Nicea

Wet

Psalm 99:4, 5 (p. 492)

- 4 Bidders het gepleit / in die worstelstryd; / daar het lig gekom / uit die wolkkolom,
dat hul dankbaar-trou / God se wet kon hou: / heil'ge lewensorde / hul van God geworde.
- 5 By U, HERE, is / daar vergiffenis, / ook al het u trou / nie hul straf weerhou.
Loof, verhef die HEER; / werp jul voor Hom neer! / Bring Hom roem en ere – / heilig is die HERE!

Gebed

- *Doksologie:*
- *Aanbidding:*
- *Skuldbelydenis:*
- *Vergifnis:*
- *Dank:*
- *Smeking vir die nood van die gemeente en voorbidding vir die kerk, owerhede en sondige wêreld, asook die beroep op die beloftes van God:*
- *Algemene bede:*
- *Verligting van die Gees ter wille van die Woorddiens:*

Amen.

Psalm 103:7 (p. 505)

- 7 Geen vader wat, deur smartgevoel bewoë, / sy kind aanskou met teerder mededoë
as Is'els HEER die wat Hom eer en vrees. / Hy weet wat van sy maaksel is te wagte,
hoe swak van moed, hoe klein ons is van kragte, / en dat ons stof van jongs af is gewees.

Skriflesing: Esegïel 21

Teks: Esegïel 21:12

Skreeu en huil, o mensekind; want dit gaan teen my volk.
(Esegïel 21:12 AFR53)

Die laaste woorde wat ons hoor van die eertydse paradys is dat gérubs met die swaard wat vlam en flikker die toegang tot die tuin bewaak sodat die mens nie daar kan inkom nie.

- Hierdie swaard wat flikker en vlam is die simbool van die straf van God oor die mens.
- Nader bepaal: Dit simboliseer die doodstraf wat oor die mens uitgespreek is wat, as hy in die tuin sou terugkom, hy daarmee doodgemaak sou word.

Maar dit simboliseer ook die straf van God wat ons sal moet verduur as ons weer toegang tot sy heiligdom wil hê.

- So verskriklik gaan God elkeen van ons se sondes straf!
- Hy gaan met 'n swaard wat flikker soos weerlig onder ons maai.
- En dan, as Hy klaar doodgeslaan het, is sy toorn eers versoen.

Hierdie hele gedeelte vertel van die woede van God.

- Dit verhaal van die wraak wat God gaan neem oor ons sondes.
- Maar dit verhaal ook dat ons dit nie sal kan dra nie, want dit is te erg.

Dan besef ons: iemand anders sal moet kom om die straf te verduur.

- Ons moet huil en skreeu, want dit gaan oor óns sondes.
- Ons moet egter nie net skreeu en huil omdat ons met ons sondes die Here tot oneer is nie!
- Ons moet huil en skreeu omdat hierdie sondes van ons sulke verskriklike geweld oor ons gaan bring!

Esegiël bly reeds in Babel as hy hierdie profesieë neerskryf.

- Hy is saam met die eerste groep Jode weggevoer, maar hulle het nog altyd bly hoop dat Jerusalem nie vernietig word nie.
- Nou openbaar die Here aan hulle dat Jerusalem verwoes gaan word – die Here kan nie anders nie, want hulle sondes is te groot.
- Die Here teken sy woede vir hulle soos 'n swaard. Die swaard gaan verwoesting aanrig oor verskeie volke, maar veral dan oor Jerusalem.
- Die oordeel van God gaan nie net buite die kerk bly nie. Dit gaan ook oor die kerk self kom!

Die Jode in Babel het hierdie beeld van die swaard goed verstaan.

- Hulle het Babel se militêre krag baie goed geken.
- Maar wat 'n geweldige skok moes wees, was dat die Here nou juis dit gaan gebruik as instrument om sy oordeel te voltrek!
- Die Jode het altyd alles buite Jerusalem beskou asof dit ook buite die hemel sou wees.
- Nou moes hulle meteens agterkom dat die Here ook die krag van die heidene in diens van sy eer het.

So kondig die Here sy oordeel aan.

- Die heidene is so in diens van God dat die Here sê dat dit Hy is wat sy swaard uittrek.
- Hy is so vertoornd dat Hy die swaard nie weer in sy skede gaan terugsit nie.
 - Hy gaan aanhoudend slaan daarmee.
 - Die swaarste lyde is aan die kom oor hulle wat nie wou hoor nie.

Vers 7 beskryf nou ons in ons sondes:

... elke hart sal versmelt, en al die hande sal slap word en elke gees verstomp en al die knieë sal wegvloei soos water. (Esegiël 21:7b AFR53)

Die beskrywing dien twee tydperke.

- Eerstens beskryf dit hoe ons daartoe gekom het om sonde te doen.
- Ons was net nie opgewasse teen die kwaad nie. Ons was onwillig. Ons hande en knieë was nie in die diens van die evangelie nie.

Maar terselfdertyd beskryf dit ook die toestand wat ontstaan wanneer ons sonde doen.

- Ons harte sal versmelt van vrees wanneer ons met die toorn van God oor die kwaad te doen kry.
- Die hande word slap van onmag teen die almag van God. Die hart en gees van die mens word stomp omdat die duiwel jou al hoe meer blind maak vir God se waarheid.

So staan almal so magteloos voor God.

- Israel het so voor God gestaan en ons staan net soos hulle voor die Here.
- Magteloos teenoor God se straf.

Dan begin die Here self praat. Hy vertel dat Hy 'n swaard voorberei het.

- Die swaard is skerp gemaak en geskuur.
- Die Here maak die swaard met baie groot sorg gereed om daarmee aan te oon met hoeveel sorg Hy ook sy toorn en straf gaan uitvoer.

Dis verskriklik om daaraan te dink. Vers 11 sê:

En Hy (God) het dit gegee om te skuur, dat hulle dit in die hand kan vat. Dit is skerp gemaak, die swaard, en dit is geskuur om dit in die hand te gee van hom wat doodslaan! (Esegiël 21:11 AFR53)

Eerstens praat die Here hier van die Babiloniërs.

- Die Here het aan hulle die militêre slaankrag gegee om die Israeliete dood te slaan, en weg te voer.
- Maar net so het God ook aan die satan die mag en die middele gegee om die ongehoorsames eendag in die hel te gaan vermink.
- Die satan is die een wat doodslaan – die een wat glad nie in die lewe belangstel nie.

So lyk die toestand. Daarom moet die mens skreeu en huil.

- Hierdie oordeel gaan nie teen die verwerptes alleen nie. Dit gaan ook teen ons – God se volk!
- Want ons moet doodeenvoudig gestraf word omdat ons dit verdien. Wat vir 'n soort God sou die Here wees as Hy al die ongeregtighede sommer net miskyk?
- Hy vergewe, maar Hy straf ook! En die straf is nie maklik nie.

Die swaard word met al twee die hande vasgevat en dan word die volk soos hulle voorkom net doodeenvoudig afgemaai.

- Die mense wat voorkom word op die heupe middeldeer gekap. Dit word 'n slagbank, sê die Bybel.
- Soos 'n weerligstraal flits die oordeel van God in die straf oor die mense.

So sal Ek dan ook my hand teen my hand slaan en my grimmigheid tot rus bring; Ek die HERE, het dit gespreek. (Esegiël 21:17 AFR53)

Hierdie straf moet dus voltrek word om God se grimmigheid tot rus te bring. Dis wat op Golgota gebeur het.

- Die Here wou ons nie met sy blink geslypte swaard afmaai nie, want ons sou nie die straf oorleef nie.
- Daarom is Jesus Christus in ons plek gestraf.
- Die toorn wat Hy moes verduur, was soos wat hierdie slagveld beskryf word. Verskriklik, wreed en bloedig. So, dat sy bloed self moes loop uit die spyker gate.

Dit alles moes wees sodat God se grimmigheid tot rus kon kom.

Die straf word in Esegïel in vier dele aangekondig. Van vers 8 tot 11 word die swaard geteken in sy doodmakende krag. **Dis die eerste deel.**

- Die snelheid waarmee die mense in Jerusalem gaan val, word beskryf – dis die mense binne die kerk.
- Daar was Jode wat gedink het dat 'n mens geen straf sou oorkom as jy in Jerusalem is nie.
- Net so is daar mense wat dink dat dit heeltemal genoeg is as jy aan 'n kerk behoort.

Jou lidmaatskap van die kerk wend nie jou einde af nie. Almal – die binne die kerk en die buite die kerk – wat ongehoorsaam is aan God, word gestraf.

Die tweede deel word geteken in vers 12: **almal moet weeklaag**. Daar is net plek vir trane en hartseer as jy in God se woede beland.

Die derde deel van die straf word beskryf in vers 14 tot 15a.

- Die swaard moet nou met al twee hande geneem word en met die snelheid van 'n weerligstraal heen en weer geslaan word.
- Die moorddadigheid van die swaard verdrievoudig.

Die vierde deel van die straf is van vers 15 tot vers 17.

- Die swaard hou nie op om te slaan nie. Dit hou aan totdat God se grimmigheid bevredig is.
- Hier word die oordeel so sterk gestel dat dit nie meer iemand anders is wat die swaard hanteer nie. Dis nou God self.

Hierdie straf beskryf aan ons wat alles gebeur het van die geboorte van Jesus Christus af, tot met sy dood aan die kruis.

- Die aanvegtinge van die satan het al feller geword.
- Die toorn van God al hoe groter, totdat dit sy hoogtepunt bereik wanneer die Here Jesus aan die kruis hang en dit uitskreeu dat selfs God Hom verlaat het.

Dit word donker.

- Dit word helder oordag pikdonker. So erg was die straf wat Jesus moes verduur vir ons dat selfs die son nie eers sy lig kon gee nie.
- Dit is wat ons gaan herdenk. Die kruisiging van Jesus Christus – die feit dat die Here Jesus Christus al die straf gedra het vir die hele volk van God.
- Toe kies die Here Jesus om ons skreeu en huil van smarte te verduur omdat ons nie in die hemel kon ingaan nie, en omdat ons ook nie die verskriklike toorn van God kon dra nie. Hy doen toe alles vir ons!

Nou moet ons na regte skreeu en huil van blydschap omdat die Here Jesus hierdie verskriklike toorn gedra het en omdat ons sondes ons daardeur vergewe is.

- Nou is die grimmigheid van God tot rus.
- Nou is daar vir ons plek gereed in sy ewige woning.

Amen.

Slotgebed

Slotpsalm 66:8 (p. 322)

8 Was ek deur ongeregtighede / en hul aanloklikheid bekoor,
dan het die HEER na my gebede / en jammerklagte nie gehoor.
Maar Hom, die kenner van die harte, / was ook my diepste wens bekend;
Hy het gehoor, en in my smarte / die oor na my gebed gewend.

Die HERE sal jou seën en jou behoed;
Die HERE sal sy aangesig oor jou laat skyn en jou genadig wees;
Die HERE sal sy aangesig oor jou verhef en aan jou vrede gee.

Amen.

Dr MJ du Plessis
Hulpdienspredikant Gereformeerde Kerk Clanwilliam
Datum: 12 Mei 2013